

tresses de cheueux: quelqu'unes d'entr'elles ont aussi des chaines, ceintures, & des brasselets faits de poil de porc epic, taints en rouge cramoisy & fort proprement tissuës, les uns larges comme une fangle, & les autres comme une grosse gance, & cette teinture est si viue & tient de telle sorte qu'elle fait honte à l'escarlate.

Pour les ieunes hommes ils ont la mesme curiosité de s'embellir & farder comme les filles. Ils huylent leurs cheueux & y appliquent des plumes & du duuet fort ioliment, & au lieu de collet de fine toille, ils se font des petites fraizes du mesme duuet, qu'ils mettent autour de leur col, fort proprement arrangez. Il y en a qui pour brauerie portent de grandes peaux de serpens sur le front en guise de fronteaux, qui ||
373 leur pendent par derriere une grande aulne de Paris de chacun costé.

Ils se peignent aussi le corps & la face de diuerses couleurs, de vert, de iaune, de noir, rouge & violet qui sont leurs couleurs les plus communes. Vous leur voyez quelquefois la face toute bigarée de rouge, & de vert, quelquefois ils n'en peignent qu'un costé, depuis le sommet de la teste iusques au col, il y en a de si industrieux qu'ils se figurent toute la face, & le corps deuant & derriere, de passemens tirez au naturel, & des compartimens avec diuerses figures d'animaux assez bien faites pour des personnes qui n'ont pas appris l'art de la peinture.

Mais ce que ie trouuois de plus estrange, & d'une folie plus eminente, estoit de ceux qui pour estre estimez courageux, & redoutables à leurs ennemys, pre-